


AWIG-AWIG
DESA ADAT TANGKUP ANYAR



DESA TANGKUP
KECAMATAN SIDEMEN
KABUPATEN KARANGASEM

MURDHA WAKYA

Om Swastyastu

Purwa pangastungkaran tityang Krama Desa Adat Tangkup Anyar, ring buk padan Ida Sang Hyang Widhi maka sangkan paraning dumadi, Bhatara-bhatari sane malingga ring Pura Puseh Desa Adat Tangkup Anyar, minakadi Pura kahyangan sami sane wenten sajeroning wawengkon Desa Adat Tangkup Anyar, duaning malarapan saking kerta wara nugrahan paduka Bhatara Samudhaya, karya puniki kasidha puput.

Kaping kalih hatur pangayubagian tityang krama Desa Adat Tangkup Anyar, pingajeng ring ida dane para Panglingsir, Keliang, Pamangku, minakadi ida dane sang maraga cestakara, widagdha pradnya wicaksana sareng sami, sane sampun sangkaning sueca ledang sareng mapawangun ngeripta uger-uger marupa awig-awig Desa Adat Tangkup Anyar puniki, pacang kanggen sepat siku-siku sajeroning desa kantos kaungkur wekas.

Taler majeng ring Pamerintah Daerah Kabupaten Karangasem, para manggala sane mastika ngiwang patutang awig-awig, tityang ngaturang pangayu bagia, duaning sampun kasidhan nureksa maritetes saha mastika kantos marupa puput.

Mungguing daging ipun manut Tri Hita Karaṇa, indik kahyangan genah ngadisthana Ida Sang Hyang Parama Wisesa. Indik pawongan pinaka krama desa, indik palemahan pinaka wawidhangsan desa, mabantang antuk lekita sastra-gama, sasana, pasuara, dresta, minakadi sane sawosan, sane anut ring pamargin dharma agama kalih dharma nagara. dumadak kasidhan mamangguhang kajagadhitian sakala niskala.

Om santih santih santih Om.

PRATHAMAS SARGAH
HARAN LAN WAWIDANGANDESA
Pawos 1

- (1) Desa puniki mawasta Desa Adat Tangkup Anyar; salantur ipun kinucap kalih kasuratang sajeroning lekita Desa Adat Tangkup Anyar.
- (2) Wawengkon prabumyan Desa Adat Tangkup Anyar mawates nyatur-desa, manut sakadi kinucap ring sor puniki :
 - ha. Tepisiring Wetan utawi Kangin : Panepin Kulon prabumian Desa Adat Wangsean;
 - na. Tepisiring Kidul utawi Kelod : Panepin Kaler prabumian Desa Adat Tangkup Desa,
 - ca. Tepisiring Kulon utawi Kauh : Panepin Wetan prabumian Desa Adat Tabu.;
 - ra. Tepisiring Lor utawi Kaler : Panepin Kidul prabumian Desa Adat Sangkan Gunung.
- (3) Sajeroning wawengkon Desa Adat Tangkup Anyar, wenten banjar mawasta Banjar Adat Bunder Kelod, Banjar Adat Bunder Tengah, Banjar Adat Juuk limo.

DWITYAS SARGGAH
PIKUKUH MIWAH PATITIS TATUJON
Pawos 2

Maka pikukuh Desa Adat Tangkup Anyar, ngarajegang, mikukuhin, kalih mitindihin pisan :

- ha. Pancasila.
- na. Undang-Undang Dasar 1945.
- ca. Tri Hita Karana.
- ra. Peraturan Daerah Provinsi Bali Nomor 4 Tahun 2019, Tentang Desa Adat di Bali..

Pawos 3

Desa Adat Tangkup Anyar ngamanggehang patitis tatujon, luir ipun :

- ha. Ngutamayang tata-cara maagama Hindu;
- na. Ngawanganang katreptian sajeroning Desa Adat, mangda kasidhan rajeg katreptianing praja;
- ca. Ngawerdiyang kawicaksanan minakadi kapradnyanan, maka larapan gumawe gemuh landuhing praja;
- ra. Ngamanggehang kalih ngawerdiyang padruweyaning desa, majalaran kawicaksanan guna laksana manut dharma-prawerti;
- ka. Ngarajegang Dharma-Agama miyah Dharma-Nagara.

TRITYAS SARGGAH
SUKERTA TATA PAKRAMAN

Palet 1

Indik Krama

Pawos 4

- (1) Sane kasinanggeh krama desa,luire :
- ha. Sang sapa sira ugi jenek magenah ring wawengkon Desa Adat Tangkup Anyar, lintang ring enim sasih utawi 210 (satak dasa) dina sane rajeg maagama Hindu;
 - na. Sang sapa sira ugi wed saking Desa Adat Tangkup Anyar, jenek magenah ring liwaring Desa Adat Tangkup Anyar,nanging kantun mipil ring banjar utawi Desa Adat Tangkup Anyar,sane mula pagenahania nguni.
- (2) Papalihan krama desa, kadi hinucap ring sor puniki :
- ha. Krama Ngarep inggih punika krama desa sane bulangkep wed saking Desa Adat Tangkup Anyar,sane sampun mipil ring banjar utawi ring Desa Adat Tangkup Anyar matataturun cumek saha maayahan saurah-arih;
 - na. Krama Ngarep inggih punika krama desa sane bulangkep, mawit saking liwaring Desa Adat Tangkup Anyar sane sampun mipil ring banjar utawi ring Desa Adat Tangkup Anyar matataturun cumek saha maayahan saurah-arih;
 - ca. Krama Truna inggih punika lanang minakadi istri sane kaselir kabuatang antuk desa, lagi nyanggra saraja karyan desa sane kaunadikaang antuk Prajuru Desa;
 - ra. Krama nyada inggih punika krama desa sane sampun tan keni ayahan wit sangkaning pinunas ngaraga tur sampun kalugra antuk Prajuru Desa mawiwit saking :
 1. Mabukti sungkan rahat tur tan sidha waras;
 2. Antuk lingsir tan sidha maayahan, miwah sampun mayusa 70 (pitung dasa) warsa;
 3. Sangkaning kasundul antuk okane sane pinih unggur marabian.
 - ka. Krama balu inggih punika krama desa lanang wiadin istri , sane katinggal seda antuk rabinia, krama desa lanang sane kakawonin napihan antuk rabine, wenten balu camput, wenten balu masentana;
 - da. Krama ring liwaring desa, inggih punika sang sapa sira ugi wed saking Desa Adat Tangkup Anyar, jenek magenah ring liwaring Desa Adat Tangkup Anyar, nanging manggeh mipil ring banjar utawi ring Desa Adat Tangkup Anyar.
- (3) Krama tamiu inggih punika krama sane kinucap ring sor puniki :
- ha. Sang sapa sira ugi wed saking liwaring Desa Adat Tangkup Anyar, jenek magenah ring wawengkon Desa Adat Tangkup Anyar;
 - na. Sang sapa sira ugi wed saking liwaring Desa Adat Tangkup Anyar, makakubon ngenahin Palemahan minakadi : tegal, carik, palasan, ring wawengkon Desa Adat Tangkup Anyar, naging kari manggeh makrama desa ring kamulan desania.

- kabuktiang antuk sewala patra sasinahan saking keliyang desania.
- (4) Tamiu inggih punika sang sapa sira ugi magenah ring wawengkon Desa Adat Tangkup Anyar, yan tan magama Hindu, tan sareng saparikramaning Agama Hindu ring Desa Adat Tangkup Anyar;
 - (5) Sang sapa sira ugi rauh ka jeroning Desa Adat Tangkup Anyar, nanging tan nekeh magenah irika, kasinanggeh tamiu ngajag, sang karauhan tamiu patut matur supeksa ring Prajuru Desa,yan tan asapunika, Prajuru Desa wenang nundung tamiu inucap mangda matinggal saking desa.

Pawos 5

Ngawit tedun makrama desa:

- (1) Krama desa sane mawed saking Desa Adat Tangkup Anyar, malarapan antuk tateragan desa, luire : sampun bulangkep, saha sampun mawiwaha, katerag tedun makrama desa sasampun pawiwahane mamargi 6 (nem) sasih.
- (2) Sang sapa sira ugi sane wed saking liwaring desa, magenah ring wawengkon Desa Adat Tangkup Anyar, sampun lintang ring 3 (tigang) sasih utawi105 (satus lima) dina katerag antuk desa nemonin rahinatatkala Pasangkepan Desa saha sampun kajantenang malarapan antuk lekita saking desania;
- (3) Sang sapa sira wed saking Desa Adat Tangkup Anyar, matinggal ka liwaring desa, wastu malih mawali ka Desa Adat Tangkup Anyar:
 - ha. Yan sangkaning raayu kalih saking palugrahan Prajuru Desa patinggale nguni, wenang mawali mipil ring sinalih tunggil banjar ring Desa Adat Tangkup Anyar, nganutin sukertan desa;
 - na. Yan sangkaning tan rahayu patinggale nguni, yogya katengahang babaoseka desa, mangda kabaosan antuk Prajuru Desa, manut pamutus pararem, prasidha mipil pinaka krama Desa Adat Tangkup Anyar.

Pawos 6

Husan makrama desa ring Desa Adat Tangkup Anyar, malarapan antuk :

- ha. Seda;
- na. Sangkaning pinunas ngaraga, saha polih palugrahan Prajuru Desa;
- ca. Tedah utawi tilar saking Agama Hindu;
- ra. Kasepekang saha kaheladang antuk desa.

Pawos 7

- (1) Swadharmaning krama desa :
 - ha. Krama Ngarep, yogya keni paayah-ayahan, tata-turun cumek, nyanggra saraja karyan desa, manut ungguan soang-soang.
 - na. Krama Truna, yogya nyanggra saraja karya ritatkala aci,sanekatiwakang antuk

- desamanutdresta;
- ca. Krama Balu lanang sane maduwe sentana istri miwah krama balu istri sane maduwe sentana lanang sane sampun napak wirang pateh sakadi krama ngarep,
 - ra. Krama desa ring liwaring desa, yogya ngaturang panahub ka desa satunggil ngayum wawanganan ring pura kahyangan amongan desa, gung artha manut pararem,
 - ka. Krama Tamiu yogya ngaturang panahub ka desa ngamasa-masa, satunggil ngamargiang yadnya olah desa, gung artha manut pararem,
 - da. Tamiu tan sareng sapalikramaning agama Hindu, naging tan wenang piwal ring Awig-Awig, Pararem Desa miwah pamutus Pararem Desa, sane ngindikang tata pawongan kalih Palemahan;
 - ta. Krama desasamian yogya saturut ring daging Awig-Awig Desa, pararem miwah pamutus Pararem Desa, ngutsahaang mangda kasidhan mapikolih sakadi patitis tatujon desane kinucap ring ayun, tumus mamangguhang kajagadhitinan praja,
- (2) Phalapeksaning krama desa :
- ha. Krama desa samian yogya polih pasayuban wiadin paroban saking desa, saluring wyawaharania yogya kabaosang antuk Prajuru Desa manut tata titining wicara,
 - na. Krama desa samian patut ngalaksanaang Panca-yadnya sajeroning Desa Adat Tangkup Anyar, manut desakala patra, sastra-agama, miwah nganutin siptan desa inucap;
 - ca. Krama desa miwah krama ring liwaring desa sane sampun mipil, wenang polih babagan layuban aci-aci saluir ipun, tuas-tuasan, miwah sane patut katiba ring krama desa;
 - ra. Mapuangkid inggih punika tan tedun maayahan, yogya saking pangloktikan kalih palugrahan Prajuru Desa;

Palet 2
Indik Tata Praja Desa Adat
Pawos 8

- (1) Prajuru Desa Adat Tangkup Anyar, luire :
- ha. Bandesa;
 - na. Panyarikan Desa;
 - ca. Juru Raksa;
- (2) Sabha Desa Adat Tangkup Anyar, luire:
- ha. Manggala sapisanan Angga;
 - na. Panyarikan sapisanan Angga;
 - ca. Angga
- (3) Kertha Desa Adat Tangkup Anyar, luire

- ha. Manggala sapisanan Angga;
 - na. Panyarikan sapisanan Angga;
 - ca. Angga
- (4) Banjar Adat, luire:
- ha. Klihang Banjar;
 - na. Panyarikan;
 - ca. Juru Raksa;
 - ra. Kasinoman

Pawos 9

- (1) Sanewenang kaadegang wiadin kamanggehang dados Prajuru Desa, luire :
 - ha. Krama Ngarep sane jenek magenah, makrama desa, matata turun cumek, mayahan sahurah-harih ring Desa Adat Tangkup Anyar;
 - na. Tan cedangga, sakadi peceng, perot, cungih lan sapanunggilan ipun, sane katandangin kabakta saking wahu hembas;
 - ca. Wikan mamaos kalih nurat Aksara Bali utawi Latin;
 - ra. Mabukti tan nahen malaksana corah.
- (2) Pidabdab ngadegang Prajuru Desa :
 - ha. Paruman Desa ngawentenang saseliran, pangawit Paruman Desa matujuang sang pacang kadegang dados Bandesa, yan kantos lintangan ring adiri sane katuju antuk Paruman Desa, yogya melarapan antuk nunas ica masrana antuk lekesan;
 - na. Munggung ngadegang Pamadhen Bandesa, Panyarikan, Juru Raksa, saking panyudin Bandesa, sane kabriyukin antuk Paruman Desa taler sane akehan yogya turut;
 - ca. Lamine dados Prajuru Desa wantah limang warsa saking dina pangadegane sajaba kapadgatakalan minakadi sangkaning wenten wiawahara;
 - ra. Yan sampun nahen madeg pinaka Prajuru Desa, dados kasudi malih;
 - ka. Yan wenten sinalih tunggil piwal kalaning kasudi antuk Paruman Desa, sang piwal punika wenang katiwakin pangloktika, yan tan manut paksania yogya kabaosan antuk Paruman Desa, yan jati tuhu paksania, Paruman Desa wenang nyudi sane siosan.

Pawos 10

Swadharmaning Prajuru Desa :

- ha Minabdabin desa, krama desa, pacang ngupadi kajagadhitan sakala niskala, maka darsana Awig-Awig Desa, Pararem Desa, pamutus Pararem Desa, nganutin uger-uger nagara minakadi sastra Agama Hindu;
- na Ngarancana salwiring utsahan desa kahungkur, ngarancana salwiring sanenyandang pacang wangunang, sane patut ayum, manut lokika desa kala patra,sane mabuat,

- mangda kasidhan polih palugrahan Sang Amawarat;
- ca Mamaosin salwiring wiawahara utawi wicara sane wetu sajeroning Desa Adat Tangkup Anyar, niwakang tatimbang, utawi pamutus babaos sane yogya kaputusang sajeroning Desa Adat. Yan tan kasidhan kabaosan ring desa, Prajuru Desa mituduhang mangda ngaturang ring Sang Amawarat mangda kabaosan;
 - ra Mratyaksa, nulingayang saparipolah Prajuru Desa. Luire, keliang banjar, Pamangku-Pamangku Desa, pamangku kahyangan jagat, minakadi sanesiosan sane wenten sajeroning wawengkon Desa Adat Tangkup Anyar;
 - ka Midabdabin salwiring pamargin haci-aci ring wawidangan Desa Adat Tangkup Anyar, taler nulingayang krama indike ngalaksanaang Panca-yadnya;
 - da Prajuru Desa wenang nyanggra salwiring pituduh, minakadi saraja karya saking Sang Amawarat, werat utawi ringan, sane yogya katiwak ring desa adat.
 - ta Nyanggra saraja karya ring pura Kahyangan Jagat sane kaempon antuk Desa Adat Tangkup Anyar;
 - sa Pinaka duta pacang matemuang babaos ring sang sapa sira ugi, yan paindikan punika kapineh nyandang pacang marginin;
 - wa Wenang ngawanganng PacalangDesa, sane patut nulinga katreptian sawawengkon Desa Adat Tangkup Anyar Mungguing ngadegang, swadharma minakadi phalapeksa Pacalang mungguh sajeroning Pararem Desa;
 - la Wenang ngawanganng sekaa-sekaa siosan, sane pacang ngaremba swadharma Prajuru Desa sane kabuatang;
 - ma Prajuru Desa kaadegang majalaran antuk pawintenan sane kalaksanaang ring Pura Khayangan Tiga Desa Adat Tangkup Anyar.

Pawos 11

- (1) Sane dados kaadegang wiadin kamanggehang maka SabhaDesa Adat Tangkup Anyar, inggih punika utusan saking soang-soang banjar adat sane wikan ring adat saha Awig-Awig Desa, akeh ipun mangda gasal;
- (2) SabhaDesa kaadegang olih Prajuru Desa Adat, mawaneng 5 (limang) warsa;
- (3) Swadharmaning SabhaDesa, sane madue wawenang ngaturang dharma tatimbang ring Prajuru Desa Adat;

Pawos 12

- (1) Sane dados kaadegang wiadin kamanggehang maka Kertha Desa; luire:
 - ha. PrajuruDesa Adat Tangkup Anyar, kamanggala antuk Bandesa Adat;
 - na. Utusan saking soang-soang banjar adat sane wikan ring adat saha Awig-Awig Desa;
 - ca. Sapasira ugi krama desa ngarep sane kapineh patut manut pararem.
- (2) Kertha Desa kaadegang olih Prajuru Desa Adat, mawaneng 5 (limang) warsa, saha akeh ipun mangda gasal.

- (3) Swadharmaning Kertha Desa:
- ha. Madue wawenang nerima, nureksa miyah maosin sahananing wicara sane metu ring desa ddat;
 - na. Dasar muputang wicara malarapan antuk Awig-Awig mingsinggihang paras paros sarpanaya;
 - ca. Yan tan prasida puput wicarane, Kertha Desa patut ngaturang ring Majelis Desa Adat (MDA) manut papalihan.

Pawos 13

Phalapeksa Prajuru Desa, Sabha Desa miyah Kertha Desa:

- ha. Luput papeson minakadi raramon rikala ngaci manut pararem;
- na. Wenang polih tuas-tuasan kalah tanding;
- ca. Wenang polih piolah-olah saking gunakayan desa manut pararem;
- ra. Yan sajeroning kari madeg dados Prajuru Desa, Sabha Desa miyah Kertha Desa raris seda polih pangelad saking desa.
- ka. Yan sampun puput pangadege, patut kawentenang upacara pangelad saking desa manut pararem.

Pawos 14

Prajuru Desa, Sabha Desa miyah Kertha Desa kagentosin utawi usan, majalaran antuk :

- ha. Seda;
- na. Mabukti sungkan rahat tur suwe kantos lintang awarsa;
- ca. Mapinunas sangkaning raayu, saha polih lugraha saking Paruman Desa.
- ra. Tutug sengker pangadege;
- ka. Malarapan antuk iwang.

Palet 3

Indik Sangkepan miyah Paruman

Pawos 15

Mungguing sangkepan lan paruman Desa, kadi ring sor puniki :

- ha. Sangkepan Prajuru Desa magenah ring Bale Pasangkepan Desa Adat Tangkup Anyar wiadin genah siosan sanunggil ngasasih sadurung sangkepan desa;
- na. Sane patut nedunin sangkepan punika Kertha Desa, Prajuru Desa Adat, Prajuru Banjar adat, Pamangku Desa, minakadi sang sapa sira ugi sane kabuatang antuk Prajuru Desa;
- ca. Maka manggalaning mababaosan sajeroning sangkepan, paruman, manggeh Bandesa, wiadin sinalih tunggil Prajuru Desa saking palugrahan Bandesa;
- ra. Pasangkepan Desa kawentenang satunggil ~~Kedite amans~~ katedunin antuk krama desa Ngarep makasami,
- ka. Paruman Desa dados kawentenang padgatakala manut werat wirasane sane pacang

- kabaosang mawit saking pamutus Prajuru Desa sajeroning paruman desa;
- da. Banjar adat, pamaksan pura, sekaa-sekaa siosan,sane wenten sajeroning Desa Adat Tangkup Anyar tan kalugra ngawentenang sangkepan kalaning dina pasangkepan desa, yan mamurug, yogya sangkepan sekaa inucap kawangdeang.

Pawos 16

Tata kramaning pasangkepan lan paruman :

- ha. Saya patut makta pasayaan, tegep eteh-eteh pasayaan, manut pagilih urak;
- na. Yan kapatut pacang nganggen babanten sakabuatan, Prajuru Desa, yogya mituduhang mangda cumawis, saha nyukseraang padagingan ring sang kapituduh makarya babanten;
- ca. Saya Desa wenang nepak kulkul, yan sampun carem kramane ngraris aturan punika kahantebang, mabriuk muspa sareng sami, ngraris mababaosan kantos puput;
- ra. Babaosan sajeroning sangkepan lan paruman, ugi ngupadi karahayuan jagat, minakadi ngarajegang kamuruban Sang Hyang Widhi, majalaran bhawa laksana manut drestra;
- ka. Yan wenten sinalih tunggil ngatengahang babaos sajeroning sangkepan lan paruman, yogya kadamyakang, yan nandang baosin, yogya rinaosan, yan tan nandang baosin, hantukang ring sang ngamimitin;
- da. Pamutus babaos, wiadin pararem sajeroning sangkepan lan paruman malarapan antuk briuk sapanggul hanut sang niangkepin, yogya kalekitaang lan kalaksanaang;
- ta. Prade tan puput babaose sajeroning sangkepan kantos ping tiga sangkepane, patut katengahang sajeroning paruman, pamutus babaos sajeroning paruman pinaka pamutus pamekas;
- sa. Sangkepan punika kabaos puput, yan sampun pamutus babaose kadamyakang, rarisi nimbalang pagilih saya, saha sampun mabacak.

Palet 4 Indik Kulkul Pawos 17

- (1) Sajeroningwawengkon Desa, wenten babacakan kulkul, kadi ring sor:
- ha. Patedunan: Atulud;
- na. Panca Yadnya: Ngoncang;
- ca. Kasedayan:Duang tulud
- ra. Panca bhaya: Kulkul bulus
- ka. Kulkul pangandeg wiadin wangde: tigang kelentungan.
- (2) Mungguingsuaran kulkul punika mangda mabhina-bhinayan sawiji soang, manut sor singgih;
- (3) Nepak kulkul manut Tri Brata Sandhi : dharma, sima, laksana, tegesipun :
- ha. Dharma sandhi : suaran kulkul maka cihna wiadin tatenger upacara agama wiadin yadnya;
- na. Sima : suaran kulkul maka cihna wiadin tatenger Panca bhaya;

- ca. Laksana : suaran kulkul maka cihna wiadin tatenger patedunan.
- (4) Indik tatepakan kulkul manut pasobhaya kuna dresta minakadi :
 - ha. Atulud : patedunan;
 - na. Dwang tulud : Kaicalan;
 - ca. Tigang tulud : kasedaan;
 - ra. Kulkul bulus : Panca bhaya
- (5) Hungguan nepak kulkul :
 - ha. Yan nepak kulkul tatenger patedunan, ugi kulkul sane kadruwe antuk sekaa, katepak antuk sang patut ngulkulang;
 - na. Yan nepak kulkul tatenger Panca bhaya, wenang saungguan-ungguan, asing nampek genahe, wenang katepak antuk sang rihinan manggihin bhaya punika, minakadi saking pituduh sang ngawiwenangang;
 - ca. Yan nepak kulkul tatenger upacara agama, dewa yadnya, bhuta yadnya, manusia yadnya lan pitra yadnya, wenang kulkul sane wenten ring soang-soang genah upacarane;
 - ra. Yan kalaning ngalungaang bhatara, mendak bhatara, Bhatara turun kabeh, kalaning pacaruan desa, sami kulkule dados suarayang, tatepakan manut dresta;
 - ka. Yan wenten mamurug nepak kulkul tan manut dresta yogya kabaosin antuk Prajuru Desa katiwakan panglokika saha pamidandha manut pararem.

**Palet 5
Indik DruwenDesa
Pawos18**

Sane kadruwe antuk desa, luire :

- ha. Pura kahyangan Tiga :
 1. Pura Desa;
 2. Pura Puseh;
 3. Pura Dalem.
- na. Pura kahyangan desa :
 1. Pura Taman Sari;
 2. Pura Prajapati;
 3. Pura Pangulun Setra;
 4. Pura Catus Pata.
 5. Pura Pasimpangan
- ca. Pura kahyangan sane kaempon kahupapira kaaci-acinin antuk desa, luire :
 1. Pura
 2. Pura
 3. Pura
- ra. Setra duang palebahan, luire : setra lingsir lan setra alit;
- ka. Palemahan sane kaanggen margi lan rurung;

- da. Bale Banjar;
- ta. Tanah palabha Pura Desa, laba Pura Khayangan Desa, tanah ayahan desa manut lekita tanah punika;
- sa. Sakancan kelebutan toy, sane dados kaanggen pasucian Ida Bhatara, sane dados kaanggen beji, miwah kasalud antuk krama desa, sane dados tantan ka desa adat;
- wa. Pralinggan Bhatara;
- la. saluiring utsaha sane kadruwe antuk desa manut pararem.

Pawos 19

Piolih-olih desa, luire :

- (1) piolih pamupon labha pura druwen desa;
- (2) urunan, panahub, pakenin-kenin pakaryan krama desa;
- (3) aturan, dana punia;
- (4) piolih-olih saking saluiring utsaha sane kadruwe antuk desa.

Palet 6 Indik Laluputan Pawos20

- (1) Luput mapiteges nenten keni papeson.
- (2) Sane luput papeson, luire :
 - ha. Prajuru Desa;
 - na. Pamangku Khayangan Tiga;
 - ca. Pamangku Kahyangan Desa;
 - ra. Sang sapa sira ugi sane kapineh antuk desa, manut pararem.

Palet 7 Indik DadosanPatedunan Pawos21

Dadosan patedunan, sangkepan, tedun makarya miwah sanesiosan, nganutang sukerta soang-soang luire :

- ha. Yan desa madue patedunane, yogya nganggen sukertan desa, sane kagaduh antuk desa, dadosan ngaranjing ka desa;
- na. Yan babanjaran madue patedunane, yogya nganggen sukertan banjar soang-soang sane sampun kagaduh antuk banjar punika. Dadosan ngaranjing ka banjar;
- ca. Yan subak madue patedunane, yogya nganggen uger sukertan subak sane sampun kagaduh antuk subak soang-soang, dadosane ngaranjing ka subak;
- ra. Yan sekaa-sekaa madue patedunane, yogya nganggen uger sekaa soang-soang, dadosan ngaranjing ka sekaa;
- ka. Yan wenten krama tan tinut ring tatepasan lan dadosan punika, wenang babaose

- katengahang ka desa, Prajuru Desa yogya mamaosin saha niwakang pamutus;
- da. Agung alit dadosan manut pararem.

Palet 8
Indik Bhaya
Pawos22

- (1) Sane kinucap Panca-bhaya, luir ipun : jiwa bhaya, aghni bhaya, toya bhaya, artha bhaya lan bayu bhaya;
- (2) Saluiring bhaya wenang gegerang antuk suaran kulkul;
- (3) Sang sapa sira ugi krama desa sane manggihin, wiadin huning ring panangkaning bhaya, ring kang katiben bhaya, wenang ngegerang nepak kulkul manut indik kakulkulan bhaya, raris damyakang ring wadesa;
- (4) Rikala wenten suaran kulkul bulus tatenger bhaya, krama desa patut yatna, sayaga, saha sregep ngamong prabot wiadin gagaman soang-soang;
- (5) Yan sampun tatas ring bhaya punika, krama desa patut matatulung nambakin bhaya punika, manut hungguan, kalih manut patuduh sang yogya ngawiwenangang;
- (6) Sang sapa siraugi tan kawasa majajabur uthawi majajarah, rikanaling desa lankrama desa katiben bhaya. Yan wenten kacirenan mamurug, yogya katengahangka desa, wiadin katur ring Sang Amawarat;
- (7) Yan pinganan bhaya punika sampun kapineh nahnah, tan pacang nangkalen wenang kacihnaang antuk suaran kulkul lambat atuludan, wiadin pasiyar saking Sang Amawarat.

Palet 9
Indik Rarampagan lan Kekeran Desa
Pawos23

- (1) Tan kalugra nebteb, ngarebah, wit-witan saluir ipun, ring palasan, pategalan, habing, tangkid, alas miwah genah siosan sane kakeker antuk desa, yan wenten sinalih tunggil mamurug, katiwakan dandha manut lokika, manut pararem, tur taru sane karebah mantuk ka desa sasampun polih panugrahan saking Sang Amawarat;
- (2) Saluiring wit-witan sane sampun kacirenan wiadin kasawenin antuk desa pacang mangge mapawangun ring desa, pradene punika karebah antuk sang madue, yogya sang madue katiwakin dandha, manut lokika, manut pararem, taru wiadin wit-witan sane karebah mantuk ka desa, desa patut naur taru manut pangarga;
- (3) Sane wenang rampag, keker manut pidabdab ngarampag, ngeker mungguh sajeroning pararem.

Palet 10
Indik Panyanggran Banjar utawi Krama Desa
Pawos 24

- (1) Saraja karyan desa kasanggra antuk krama desa kaunadikaang antuk Prajuru Desa;
- (2) Saraja karyan banjar kasanggra antuk krama banjar, soang-soang kaunadikaang antuk keliang banjar.
- (3) Yan wenten krama desa ngawangan yadnya suka duka, kengin nunas panyanggran desa.

**CATHURTAS SARGGAH
SUKERTA TATA AGAMA**

Palet 1

Indik Dewa Yadnya

Kaping 1

Indik Kahyangan

Pawos 25

- (1) Pura-pura sane kadruwe antuk desa,sane kaempon antuk desa, indik pangaci-aci manut dresta, gagaduhan kalih pasuaran Desa,
- (2) Pura-pura kahyangan sane siosan sakadi kinucap ring ayun, papayon kalih pangaci-aci kahemponin antuk karma sane nyungsung Bhatara ring pura kahyangan punika soang-soang.
- (3) Mungguing beji, papayon kalih pangaci-acinia kaemponin antuk krama desa, yan wenten beji tan kaaci-acinin, toyan ipun tan yogya angge sadana sarwa suci,
- (4) Tan wenang nguwah-nguwuhin wawilangan palinggih bhatara,sanewenten ring pura kahyangan desa manut dresta, mangda kantun manggch kadi kuna,
- (5) Yan wenten Pura Kahyangan sinalih tunggil reneng pangaci-acinia, kantos kadasa warsan, yogya Prajuru Desa mamaosin, maritetes, ngutsahaang mangda kasidhan mawali kadi jatimula Naging prade tan kasidhan, majalaran antuk pamutus paruman desa, prasidha desa ngawanganang pangupakara mralina pura punika, mangda tan karanjingan kaumahin antuk Ki Bhuta Kubandha,
- (6) Yan wenten pura sinalih tunggil magenah ring Desa Adat Tangkup Anyar, panyungsung miwah pangempon ipun sami magenah ring liwaring desa, yogya pangempon pura punika ngaturang punia sinunggil pacaruan Tilem Kasanga ring desa ngamasa-masa, napkala pangaci-aci ugi mangda masadok ring Prajuru Desa,

Kaping 2
Indik Pangaci-aci
Pawos 26

- (1) Soang-soang pura madue gagaduhan, pinaka uger pangaci-aci, miwah babanten,
- (2) Sane yogya muput aci-aci punika sulinggih sane katuhur antuk krama pura soang-soang, utawi kanteb antuk pamangku ring pura hinucap manut kawenanganna,
- (3) Yan wenten pura sane kabempon antuk Desa sane durung madue Pamangku, utawi

pamangkune kapialang, dados nuhur sinalih tunggil pamangku kahyangan Desa, prade taler tan mresidhayang patut nuhur sulinggih;

- (4) Pamangku pura punika wantah pamangku Pura Desa, Pura Puseh, Pura Dalem, minakadi Pamangku Kahyangan sane wenten sajeroning Desa, kalugra nganteb banten pangodal, minakadi sanesiosan ring pura-pura sawawengkon Desa sane mamuatang, taler manut kawenangan pamangku.

Pawos 27

- (1) Indik pangaci-aci Pura Pamrajan, Pahibon, Dadya, punika kahamongin antuk krama desa sajeroning sekaa dadya, pamrajan, manut dresta;
- (2) Ritatkala usabha ring Pura Kahyangan Tiga,Kahyangan Desa, Pura Dadya, Ida Bhatara katuran malasti, masucion ka sagara utawi ka Pura Tirta Desa Adat Tangkup Anyar;

Pawos28

- (1) Aci-aci, piodalan, usabha, pasegeh ring pura kahyangan desa dudonania manut dresta;
- (2) Indik rahina pengaci-aci, piodalan, usabha, pasegeh ring pura kahyangan desa luire:
ha. Pura Puseh, Pura Desa utawi Pura Bale Agung ,Piodalan sasor ipun nganem sasih kala dina Sukra Paing Dungulan;
na. Pura Dalem miwah Prajapati,Piodalan kala dina Anggara Kliwon Wuku Tambir nganem sasih;Pecaruan Sasih Karo nyabran awarsa ring Pura Prajepati.
ca. Sajaba ngusaba, pangaci-aci siosan manut dresta, luire :
1. Ring rahina Galungan krama desa ngamargiang upacara Galungan;
2. Ring rahinan Kuningan, ngamargiang upacara.
- (3) Padagingan pengaci-aci saking:
ha. Piturunan lan wawijilan krama desa;
na. Piolah-olah pagunakayan krama desa;
ca. Aturan-aturan sangkaning krama suka nirmala;
ra. Piolah-olah tanah-tanah palabha pura druwen desa.
- (4) Rikala kabrebehan jagate, kageringan, katiben Panca bhaya, pinganan tan mresidhayang ngaturang aci kadi patute, yogyo Prajuru Desa miwah Pamangku Desa, ngaturang piuning ring Bhatara, masadhana babanten padhatengan, pacanangan maka cihna tan pegataci-acine. Ri wus mawali degdeg jagate, patut ngawangunang upacaraBhatara Turun Kabeh, masasirih makakobok ka sagara giri;
- (5) Yan rikala mamaayu, ngayum papayon, ring pura-pura kahyangan, pinganan tan puput kala dinaning piodalan, pangacine wenang rangkadang, naging padhatengan, pacanangan, tan dados pegatang. Ri wus puput masasapuh saluire, malih mawali kadi nguni.

Kaping 3

Indik Sukerta Pura Kahyangan

- (1) Rikalaning ngaturang aci-aci amung pamangku ring kahyangan punika sane dados munggah tedhun ring palinggih-palinggih pura kahyangan inucap, taler kasarengin antuk Pamangku lan krama tiyasan sanepolih lugraha saking pamangku pura hinucap uthawi lugraha Prajuru Desa;
- (2) Pamangku sane wenang ngantebang banten ring pura, wantah pamangku sane kadruwe antuk pura punika. Yan tan madue pamangku ring pura punika utawi kapialang, dados niarad pamangku siosan sajeroning Desa Adat Tangkup Anyar, saking palugrahan Prajuru Desa;
- (3) Tan kalugra masumpah, macoran, sajeroning pura kahyangan, sajaba sangkaning wicaran pura hinucap, taler saking pabuat krama pura, utawi krama desa sane ngempon pura punika;
- (4) Tan kalugra wak capala, hasta capala, pada capala, miwah sapanunggilan ipun, sajeroning pura kahyangan. Yan macihna wenten mamurug, wenten raris ngatengahang ka desa yogya tiniwakan dandha pamarisudha kahyangan;
- (5) Tan kalugra malaksana kantos ngawetuwang biota ring pura kahyangan. Yan wenten mamurug sang kapineh sampun napak wirang, yogya tiniwakan dandha gung artha manut pararem;
- (6) Sang sapa sira ugi kacuntakan, saluiring cuntaka, yan durung mabersih, tan kalugra ngaranjing ka pura kahyangan. Yan katenger wenten mamurug, yogya katiwakin dandha marisudha kahyangan punika;
- (7) Sedahan ngengengan miwah sapanunggilan ipun tan kalugra maseha ring pura. Yan wenten mamurug, yogya dandha gung artha manut pararem;
- (8) Tan kalugra ngawentenang klecan, jajuden, sajeroning suter utawi panyengker pura kahyangan. Yan wenten mamurug, sang ngalaksanaang katur ring Sang Amawarat, tur klecanu tawi jajuden punika kawangdeang;
- (9) Tan kalugra makta saluiring sane kasinanggah tan suci ka jeroning suter uthawi panyengker pura kahyangan. Yan wenten mamurug, yogya sang mamurug marisudha pura punika;
- (10) Sang sapa sira ugi rikalaning makemit ring pura kahyangan, merem, tan kalugra madukan lanang istri, sajaba anak sane kapineh kari alit. Yan mamurug, keni dandha manut pararem;
- (11) Ring jeroan pura kahyangan tan wenang kanggen sajaba ngalaksanayang upakara upacara yadnya. Yan mamurug keni pamidandha manut pararem;
- (12) Sang sapa sira ugi, katedunan utawi kapangluh sajeroning pura kahyangan sawawengkon Desa Adat Tangkup Anyar, mababaos minangkenang pangandikan Ida Ratu Susuunan utawi Bhatara, ring gelis tunasang tirtha laluputan mangda gelis hudep. Prade sasampun kaketisin tirtha, kantun ngatemel masera-masero, ngawetuwang sumandeya kayun pamaksane, irika patut pintonin, ambilang toya apane, celebang limannane makakalih. Yan mabukti tan belus, nandang gega pangandikan Bhatara. Yan

prade belus, tan nandang gega, gelisang gingsirang mangda doh saking pura punika.

Kaping 4
Indik Pamangku
Pawos30

- (1) Ring soang-soang Pura Kahyangan ugi madue pamangku;
- (2) Sane tan wenang kaadegang dados pamangku luire :
 - ha. Cedangga luire : peceng, perot, cungih lan sapanunggilan ipun;
 - na. Mabukti sungkan rahan;
 - ca. Mabukti nahen ngarug sasana, minakadi malaksana corah.
- (3) Pidabdab ngadegang pamangku inggih punika, sangkaning kajujuh saha sampun kabriukin krama desa, yan lintangan ring adiri panyudian malarapan antuk lekesan;
- (4) Sang sapa sira ugi pinaka jan banggul, pamangku ring Pura Kahyangan Tiga, Pura Kahyangan Desa sane wenten ring sajeroning Desa, mangda pageh ngamel kalih ngalaksanaang sasanan Pamangku;
- (5) Sang sapa sira ugi krama desa sane kaadegang pamangku, yan kari alaki rabi yogya lanang istri mawinten;
- (6) Sang kasudi pacang kanggen pamangku, patut mawinten ring pura genahe dados pamangku, mungguing prabeya kasandangan antuk krama pura soang-soang, Pamangku Desa kalih Pamangku Kahyangan Jagat kasandangan antuk krama desa;
- (7) Pamangku patut madue hamongan pura soang-soang, yan tan madue hamongan pura, prasidha tan kalugra ngantebang babanten ring pura-pura saluire;
- (8) Yan wenten Pamangku katekan pati, yogya tiniwaken. Patut polih patulung prabeya atiwa-tiwa, yan Pamangku Desa kalih pamangku kahyangan Tiga polih patulung saking desa, yan pamangku siosan, saking krama pura soang-soang, agung alit patulunge nganutin pamutus babaos sajeroning pararem kala punika;
- (9) Yan pamangku wus tiniwaken, patut kakaryanang pangelad wiadin pamegar antuk krama desautawi krama pura hinucap. Yan pamangku punika kari rajeg ngamong swadharmaning pamangku kantos hantaka;
- (10) Tuas-twasan Pamangku mungguh sajeroning gagaduhan, Pararem Desa ring pura soang-soang, taler nganutin dresta;
- (11) Pamangku kagentosin majalaran antuk :
 - ha. Seda;
 - na. Mapinunas mararyan, saking patut pinunase, naging tan kantun ngalaksanaang dharmaning pamangku, kawekas kalaning seda tan polih patulung prabeya atiwa-tiwa;
 - ca. Saking patut pinunase, majalaran antuk lingsir, sampun tan mampuh, sungkan rahan tan kengin waras, kajadaang antuk krama pura, wiadindesa. Kawekas kalaning seda, patut polih patulung prabeya patiwa-tiwan;

- ra. Sangkaning kahusanang, majalaran antuk laksana mamurug sasanan pamangku. Kawekas kalaning seda tan polih patulung prabeya atiwa-tiwa.

Kaping 5
Indik Cuntaka, miwah Sosot
Pawos31

- (1) Sang sapa sira ugikrama desasanekahanan cuntaka, tan wenang ngaranjing ka pura kahyangan, ka panyuciyan kalaning nyuci gening, minakadi genah saluiring genahsanekinucap suci pingit;
- (2) Tan wenang ngaryyanin saji saluiring sajisanepacang katur ka Sanggar Tawang, sakadi suci gening. Sajawaning bantensanepacang katur ka Prajapati, DalemPanguluning Setra;
- (3) Luirsanekinucap cuntaka :
- ha. Anak istri kalaning ngrajasuala, suwen cuntakane, saking ngawit ngrajasuala, kantos nat, macihna sampun malukat;
 - na. Sang alakirabi, suwenecuntaka, ngawit saking rahina pangantenane, wiadin rahina marangkate, kantos puput mabyakaon;
 - ca. Rama rena cuntaka sangkaning ngembasang oka.Sanelanang cuntaka, suwene saking embas anake alit, kantos kepus odelnane saha masasuuk, raris malukat.Saneistri pinaka rena, cuntaka petang dasa kalih dina saking wauembas rarene;
 - ra. Yan anak istri cuntaka sangkaning karuron, pateh ring cuntaka ngembasang oka, lanang ecuntaka tigang rahina, saha sampun malukat.
- (4) Cuntaka malarapan antuk kasedayan, kaptiyan :
- ha. Yan wenten anak alit durung kepus odel raris seda, rama rarenecuntaka,sanelanang 3 dina,saneistri 42 dina;
 - na. Yan sang ngarepin, minakadi sang magenah sajeroning karang pomahan sang seda, suwen cuntakane, saking wauseda kantos puput panglemek karyane, punapike mapendem, luih yan atiwa-tiwa. Macihnaang punah cuntakane antuk marerebu, malukat;
 - ca. Sang polih ninjo, ngarap sawa, ngamel saha ngarembat saeteh-eteh pula-palining sawa, nembah sawa, mangan paridan sawa, punika taler kabaoscuntaka, punah cuntakane macihnaang antuk malukat;
 - ra. Rikalaning desa ngamargiang upacara yadnya, pet prade wenten sinalih tunggil krama kalayu sekaran, patut kamargiang sebel karang ngawit saking negdegang karya kantos masineb. Wawanengan sebel karang amung ring sang magenah sajeroning karang sane kacuntakan. Yan pacang ngamargiang sebel karang, patut mendhem makingsan kalaning wengi, tan polih panyanggran desa, sajabasang tan kapatut dados pendhem, punika maraksa sajeroning karang pomahan.
- 5) Anak wetu saking smara dudu uthawi tan pawidhi widhana pawiwanan punika taler cuntaka. Suwene cuntaka, salamine durung kaupacarain, wiadin nuduk ngangkenin

- pyanak, utawi nganggen dadaman;
- (4) Cuntaka sane mabukti madue panungkan sane tan sidha waras, minakadi sungkan hila, buduh, ngawijilang reged saking silit, bhaga, purus, tan henap mameres, berung borok taunan mabaneh, miwah saluir punika. Suwene cuntaka, salami durung waras;
 - (6) Cuntaka sangkaning cedangga manut panglokikan Prajuru Desa punika tan kawenang napak Palemahan panucyan genahnyuci gening;
 - (7) Yan wenten sinalih tunggil sang cuntaka antuk ngeraksa sawa wiadin layon, mamanah utawi mapakayun ngarauhin karya ayu atma wedana, minakadi mabhakti ring sang wenang bhaktinin, dados, naging tan wenang ngarap, ngarembat, nuwun, ngamel saupakaraning puspa lingga;
 - (8) Yan wenten sinalih tunggil krama desa durung tutug cuntaka kadi ucaping harep, mamurug larangan, yan wenten ngatengahang ka desa, Prajuru Desa niwakang pamidandha, yogya sang mamurug marisuddha sakabuatan manut panglokika;
 - (9) Yan wenten sinalih tunggil anak istri , sangkaning tan meha ngrajasuala sasampun ring pura, wiadin ring genah larangane siosan, rarisi kacirenan, wenang ya tiwakin dandha tanmeha, yogya marisudha genah punika, katulung antuk pamaksan pura wiadin pangemonge soang;
 - (10) Yan wenten sinalih tunggil krama desa, kacuntakan antuk ngeraksa sawa, wiadin layon, napkala pagililah pagantosan babanjaran ngaci-aci ring sinalih tunggil kahyangan desa, pacaruan ring desa, sadurung tutug sengker cuntakania, wenang tan tedhun maayahan, tan dinosan, yan wenten pasadok sang cuntaka ring Prajuru Desa;
 - (11) Yan cuntaka gamia gamana lan nolong smara Prajuru Desa nantosang pamutus Sang Amawarat. Yan sampun wenten pamutus saking Sang Amawarat ring desa katiwakan pamidandha manut pararem;
 - (12) Cuntaka sangkaning mabukti salah timpal, cuntaka ragan sang malaksana, miwah desa pagelahania. Tutug cuntakania yan sampun sang malaksana mrayascita panyangaskara raga, genah malaksana lan mrayascita desa. Buron sane kaajak masanggama kapademang tur katanem;
 - (13) Anak luh beling tan kapariangken antuk lanang e, suwene cuntaka kantos wenten pangupakara panyangaskara kulawisudha, anake beling mawidhi widana pawiwahan masanding keris pinaka linggan sang kadalah.

Pawos 32

- (1) Indik Sosot :
 - ha. Sapa sira ugi pacang naur sosot wiadin punagi, patut nganggen pamegat sot rikalaning dina piordanan Bhatara, ngadasa dinaang aci, patut masadok ring pamangku pura, yan ring Kahyangan Desa panaurane masadok ring pamangku pura desa minakadi Prajuru Desa. Panauran punagi punika, wau kalaksanaang yan sampun puput pangodale;
 - na. Sapa sira uginaur sasangi pacang ngaturang pangodal, ugi mangda ring dina

pagantosan piodalane. Sang naur punagi, wenang nunas kanti patulung karya ring krama utawi pangempon kahyangan. Sang naur sasangi nuksrahang daging cumek saprabheyaning pangodal ka desa;

- ca. Sapa sira uginaur sasangi maturan suaran tangguran saluiring tatabuhan, sasolahan, minakadi saluir ipun, mungguing prabheya punika sami kaangganin antuk sang masasangi;
- ra. Panawuran punagi ring Pura Kahyangan Jagat, sanewenten ring desa, manutdresta.

(2) Aturan :

Sang sapa sira ugi ngaturang dana punia, punika sami patut kaunadikaang antuk Prajuru Desa, Kelihang Pamaksan Pura soang-soang, mangda kasidhan mapwara ayu. Aturan punika kaungguhang sajeroning lekita;

(3) Sasarin Canang :

Sasampun puput pangaci-aci puja waline, sasarin canang punika kapupulang saha kawilangin. Kaunadikaang antuk Pamangku, Prajuru Desa lan Prajuru Pura, indik tatiwak lan pamargin ipun, sangkaning jati nirmala.

Palet 2
Indik Resi Yadnya
Pawos 33

- (1) Krama desa, yogya ngawreddhyang kapradnyanan, kautamaan Sang Hyang Aji Sastra, asewaka nunas pawarah ring sang maraga widagdha pradnyan, pingajeng ring sang kasinanggah guru loka; yadnya
- (2) Prajuru Desa, Kelihang Banjar, ngutsahaang kawerdhian kamuruban kautamaan Sang Hyang Aji Sastra, ngawentenang paruman, parembungan, pinaka genahkrama desa mamangguhang pawarah-warah ayu;
- (3) Kalaning diwasa ayu, wenang desa matirtha yatra, wenangdesa ngaturang punia miyah resi bhojana ring Ida Sulinggih. Taler kalaning karyautama ring desa, saluiring karya sane kaputus antuk Ida Sulinggih patut ngaturang punia. Asapunika taler ring sang mapitulung patut maweh dana;
- (4) Sang sapa sira ugi krama desa yan mapakayun pacang mapodgala, taler mangda wenten pasadok ring Prajuru Desa, sajaba patut polih palugrahan saking Sang Amawarat;
- (5) Prajuru Desa, mamatut pisan, yan krama desane mapunia ring sang pradnyan, ring sang widagdha, ring sang satata ngarajegang dharma, pingajeng ring Ida Sulinggih pasuryannane soang-soang.

Palet 3
Indik Pitra Yadnya
Pawos 34

- (1) Pamargi ngupakara sawa, ugi manut sastra Agama Hindu. Wenten makudang-kudang

- soroh, sakadi ring sor puniki :
- ha. Mapendhem ring prathiwi;
 - na. Makingsan ring ghni;
 - ca. Atiwa-tiwa, palebon, utawi ngaben;
 - ra. Yan rare durung makupak huntu wus kepus odel hantaka, wenang ngangge pangentas bangbang masadhana klungah klapa gading, ngaran ngalungah, tan wenang kaabenang;
 - ka. Yan rare durung kepus odel hantaka, pamali ngaran, pendhem juga tan hana pangupakarania kewala ganten utawi adem paican Ida Sulinggih;
- (2) Sang sapa sira ugi krama desa, tan kawasa makta sawa ka desa, yan sawa ika sampaun keni pangupakara sawa. Yan wenten mamurug, yogya katiwakan dandha, mrayascita marisudha desa;
- (3) Saluiring upacara atiwa-tiwa, palebon, uthawi ngaben, yan ngeseng ring setraugi kawenangania, tan wenang ring desa. Yan wenten mamurug, wenang dandha marisudha desa. Krama desa sang atatulung, dandha artha manut pararem;
- (4) Yan wenten krama desa nyekah sawa, macamana, mabersih, tan kalugra lintangan ring 42 dina ngawit saking dina sedane. Yogya murnnama, tilem miyah saluirupacara rarahinan. Yan kalaning angurung sawa, sajeroning Desa kawangunang karya agung kantos nyuci gening, luire matabuh gentuh, Bhataraturun kabeh, karya agung ring Basakih, yogya tumpang salu netedunang saking Balene, genahang ring natah umahe, saking bhatara kodhal kantos Ida masineb;
- (5) Tan wenang nyekah sawa yan tan macamana, mabersih, lintangan ring roras dina, ngawit saking dinaneseda. Yan wenten mamurug, dandha gung artha manut prarem;
- (6) Sang sapa sira ugikrama desa tan wenangatiwa-tiwa, ri kala pangaci-acin Desa, luire : patirthan, patoyan ring Pura Kahyangan Jagat, Pura Puseh, Pura Dalem, Pura Desa, Bhataraturun Kabeh, Tabuh Gentuh, minakadi karya agung siosan :
- ha. Yan patirtaan ring Pura Puseh, Pura Desa, Pura Dalem, miyah Prajapati, pura kahyangan jagat saking nolas dinaang aci-aci kantos Bhatara puput masineb;
 - na. Yan karya Matabuh Gentuh, Bhataraturun Kabeh, minakadi saluiring karyasanenyuci gening, saking ngawit nyuci kantos Bhatara puput masineb;
 - ca. Kalaning Bhatara ring Pucak Lempuyang katuran turun Kabeh ka Besakih, saking nigang dina Bhatara lunga, kantos Ida Bhatara mawali saha sampunrauh ring Lempuyang patut ngaturang tatingkeb ring Sagara Ujung raris masineb;
- Yan wenten mamurug kadi hinucap ring hajeng, dandha mrayascita desa, minakadi krama desa sane matulung dandha gung artha manut pararem;
- (7) Yan wenten karmadesa mendhem sawa kalaning dina larangan, kawasa, nagingugimasawen, durung magagumuk, laku kingsan ngaran sasampun polih lugraha saking Prajuru Desa;
- (8) Yan makingsan ring ghni, sawa gineseng, asti inanyut, manut dresta. Yogya nganggen tirtha pabersihan. Mungguing dewasa, sa sor ipun dewasane dados marginin mendhem

- sawa; mungguing
- (9) Tan kalugra nginepang miwah ngawangdeang bangbang ring setra, yan wenten mamurug dandha mrayascita setra;
 - (10) Padewasan :
 - ha. Padewasan mendhem ring prarhiwi miwah makingsan ring gni, wenang katiwakang antuk Bandesa;
 - na. Padewasan atiwa-tiwa, katiwakang antuk sulinggih sane pacang muput, yogya sampun kapatut antuk Bandesa,
 - ca. Indik larangan ngupakara sawa, sajaba ngunggahang ka tumpang salu,sane kamanggehang sajeroning Desa, luire :kala gotongan, semut sadulur,ingkel wong, lan pasah. Yan wenten mamurug, kapidandha manut pararem;
 - ra. Tan wenang ngagah ngulung, teges ipun, sajeroning setra tunggil, tan dados mresihin sawa, nuju dina pangutangan yan ring setra punika wenten ngalaksanaang pangabeanan. Yan wenten mamurug kapidandha manut pararem;
 - ka. Yan pacang mendhem sawa, tan kalugra ngunjalin yan genah sawa punika dados akarang pomahan, yan mamurug, kapidandha manut pararem;
 - da. Yan pacang ngamargiang upacara atiwa-tiwa dadakan dados kamargiang sajeroning 12 rahina, sajawaning wenten larangan desa;
 - (11) Tan dados nguuk utawi ngebet sawa sadina-dina, teges ipun, sajeroning setra tunggil, yan wenten ngaben lintangan ring adiri, nawa prateka, nyawa pranawa, sang pacang nyawa pranawa patut nguuk sawa sinarengan ring sang pacang mrateka mabersih ring setra, yan wenten mamurug kapidandha manut pararem;
 - (12) Tan kalugra ngaben, sadurung puput panglemek, masasapuh ring setra sang makarya ngaben riinan, yan wenten mamurug kapidandha manut pararem;
 - (13) Yan wentensawa tan kapariangken ringdesa, hingaranan bedagan desa, ugi kasukseraang majeng ring Sang Amawarat;
 - (14) Yan sawa sangkaning salah pati, angulah pati, desa tan ngalarangin, yan sawa punika tiniwaken pramangkin. Sara ledang sang madue, minakadi Ida Sang Sulinggih sanepacang muput;
 - (15) Yan wenten sinalih tunggil sawa, genahe sedawiadin padem, sajabaning karang pomahan, luire : ring tegal, pura, pasar, banjar, sekolah, minakadi genah siosan dudu karang pomahan, yogya sang madue wirange mrayascita marisudha genah punika. Yan sawa tan kapariangkenan, genah punika patut kaparisudha kaprayascita antuk sang maduwe emponan;

Pawos 35

Indik angatma wedana :

- ha. Sang sapa sira ugi krama desa, yan kalaning angatma wedhana, luire : ngaroras, patileman, baligya, tan wenang ngawangunang payadnyan, petak, ring Palemahan pura Kahyangan Desa, minakadi kahyangan siosan;

- na. Sang sapa sira ugi wus ngawangun karya angatma wedhana, yogya karang payadnya ika kapralina, sakasep ipun petang dasa kalih dina saking dina karyane.

Palet 4
Indik ManusaYadnya
Pawos 36

- (1) Sang sapa sira ugi krama desa, tan wenang ngawangunang saluiring upacara manusa yadnya ring wawidangan Palemahan kahyangan desa. Yan mamurug, wenang kapidandha manut pararem;
- (2) Sane dados kamargiang sajeroning palemahan pura, wantah ngamargiang upacara pawintenan manut dresta.

Palet 5
Indik Bhuta Yadnya
Pawos 37

- (1) Sajeroning Desa Adat Tangkup Anyar, pacaruan manut ungguan, miwah sor singgih, luire :
 - ha. Pacaruan Desa Sadakala :
 - (1) Manca satha ngamasa-masa, kala Tileming Kasanga, magenah ring pempatan agung, kaemponin antuk krama desa;
 - (2) Tabuh Gentuh, manut sakabuatan, sakasidhan.
 - na. Pacaruan desa padgatakala : rikala jagate kabrebehan, kageringan, kadurmanggalan, katiben Panca-bhaya, miwah sane siosan sane patut carunin;
 - ca. Agung alit caru, manut ungguan macaru, babwatan pacaruan, kalih nista madhya, utama manut gagaduhan pura inucap.
- (2) Pacaruan ring pura-pura Kahyangan, Pamrajan, Dadya saluire, manut dresta minakadi gagaduhan pura inucap; sukerta
- (3) Pacaruan kalaning Tilem Kasanga, ring karang pomahan soang-soang manut sastra dresta, saha kalanturang antuk brata panepian.

PANCAMAS SARGAH
SUKERTA TATA PALEMAHAN
Palet 1
Indik Tegal, Bangket lan Karang
Pawos 38

- (1) Palemahan Desa, mauger antuk tri mandhala, luire :
 - ha. Utama mandhala : Palemahan sane kaanggen genah pura, wiadin parahyangan;
 - na. Madhya mandhala : Palemahan sane kaanggen, genah wawangunan, sakadi : banjar, kantor, miwah sane siosan;

ca. Nista mandhala : Palemahan sane kaanggen setra, margi, turung, tlabah, papunduk, telajakan karang, genah ngingsanang wahana, miyah sanesiosan. Sahanan Palemahan sane wenten ring wawengkon Desa, yogya mangda madue babaledan wiadin wates sane pasti.

- (2) Sahanan Palemahan punika, ugi mangda madue margi, turung, papunduk sane dados kaentasin;
- (3) sang sapa siraugi pacang mapawangun pakarangan, pomahan, pura miyah sane siosan, patut ngutsahaang mangda madue margi;
- (4) Yan wenten pakarangan pura, pomahan, tegal, miyah Palemahan siosan kabebeng tan madue margi, rurung, miyah papunduk, sang madue patut ngatengahang babaoseka desa, Prajuru Desa yogya negdeg, ngutsahaang mangda polih margi malarapan sami suka;
- (5) Yan desa pacang ngalinggahang margi, rurung, minakadi makarya margi, rurung desa, saking sampun ingkup Pararem Desa kalih sang madue tanahe, yan nganggen tegal, miyah Palemahan siosan, wenang ngamargiang sasempalan antuk desa tan naur pangargan tanah punika. Naging yan madaging tatanduran, papayon, wawangunan saluire, desa patut ngicen prabeya agung alit manut pararem;
- (6) Sahananing karang pomahan ugi mangda masengker. Pidabdar nyengker, magaleng kadulu. Panyengker sane sisi kangin miyah Kaler, patut kakaryanin antuk sang ngenahin karang punika, sajaba karang ngele wiadin lingkehin rurung, Palemahan suwung;
- (7) Sang sapa siraugi ngenahin karang tegehan, patut naku, tegehe asukat tanah dangsah, sane tebenan, wenang nusunin;
- (8) Telajakan karang patut kypyara antuk sang ngenahin karang punika soang-soang, mangda mapikenoh tur asri;
- (9) Yan wenten sinalih tunggil nadya naleksek babaledan saluiring babaledan wiadin wawatesan, yogya katiwakan dandha manut werat ringan kahiwangane, saha maayu sane kasleksek, kalih mrayascita sakabuatan, sanenandang katibanan panyangaskara, indik degdeg wawatesan uthawi babaledan manutdresta kuna;
- (10) Yan wenten sinalih tunggil ngaletehin, ngarucakin, ngarobedin, ngararabin, miyah saluir ipun, norongang babanon, yogya katiwakan dandha gung artha manut pararem, tur maayu sane kaletehan, karucakan, karobedan, raraban inucap ring ajeng, saha mrayascita sane nandang keni panyangaskara;
- (11) Yan wenten anak ngenahin Palemahan sajeroning wawengkon Desa tan tinut makrama desa nganutin Awig-Awig miyah Pararem Desa, tan kalugra nganggen saluiring padruweyan desa, tan kalugra ngalaksanaang Panca Yadnya sajeroning Desa;
- (12) sapa sira ugi ngenahin Palemahan sajeroning Desa patut nganutin Awig-Awig miyah Pararem Desa;
- (13) sang sapa sira ugi sane pacang ngadol, ngantahang, maselangang, majegang,

masewayang, makedihang Palemahan tegal, palasan miwah sane siosan sane magenah sajeroning wawidangan desa, ugi mangda polih panugrahan saking Prajuru Desa malarapan Paruman Desa;

- (14) sang sapa sira ugi pacang migunayang Palemahan tegal, carik, pakarangan, sajaba pacang genah matatanduran, genah pomahan, yogya sangkaning palugrahan Prajuru Desa Adat, siosan ring palugrahan Sang Amawarat. Yan wenten mamurug sasampun polih kasambatsara antuk Desa, sang mamurug katiwakin dandha manut pararem.

Palet 2
Indik Kakayonan
Pawos39

- (1) Yan wenten wit-witan wiadin kakayonan ngungkulin Palemahan anak sios, sanengawinang tiyeb, tampus, ngarobedin, asing kungkulon wenang ngatengahang ka desa, Prajuru Desa maritetes saha mituduhang sang madrewe mangda ngrancap, nebteb, wiadin ngarebah. Yan kantos ping tiga pituduh desane tan kalingu, wenang katiwakan dandha sang anikel tuduh, gung artha manut pararem. Kakayonan punika prasidha karebah antuk desa picundhangan;
- (2) Tanem tuwuh utawi tatanduran siosan sajeroning karang paumahan, tan kalugra tegeh ipun lintangan ring jan palit solas, uthawi limang meter, bungkil ipun adepa agung, uthawi kalih meter tengah saking panyengkere ngajrowang. Yan mamurug, wenten taris ngatengahang ka desa, yogya sang mamurug katiwakan dandha gung artha manut pararem, saha ngarebah, sajeroning tigang rahina saking pamuput babaose;
- (3) Kakayonan sajeroning paumahan ugi mapraya mangda tan ngaletehin, ngarobedin, mamayen karang siosan, saking akah kantos dawun ipun. Yan wenten mamurug, tan tulinga ring kakayonan duwe, wenten ngatengahang ka desa, Prajuru Desa yogya maritetes, saha nepasin manut panglokika kalih Pararem Desa;
- (4) Yan wenten wit taru mentik kantos ageng ring babaledan wates, saluiring babaledan mwang wates, wenten ngatengahang ka desa, patut taru punika karebah, rans pinara tiga, apahtigayan mantuk ka desa, apahtigayan sang madue babaledan soang-soang,
- (5) Yan wenten sinalih tunggil nundungin tanem tuwuh, kakayonan, sanekaswatah pacang mamayen, wenang kabaosang ring sang madue. Yan akas sang madue, yogya katengahangka desa Prajuru Desa negdeg tanem tuwuh wiadin kakayonan punika. Yan manut panglokikan Prajuru Desa yogya tundungin, taler akas sang madue patut sepat gantungin. Yan jati kadi panwatahe, yogya sajeroning tigang dina, karebah picundangan. Sang madue katiwakan dandha gung artha manut pararem, dosane anikel tuduh. Yan tan yuktı kadi panwatahe, sang ngatengahang katiwakan dandha gung artha manut pararem, dosane angadakaken nora, tanem tuwuh wiadin kakayonan punika tan karebah;
- (6) Yen wenten sinalih tunggil nyadya nandur saluiring tanem tuwuh wiadin kakayonan sanepacang dados ageng, nesek ring babaledan, ring wates, papunduk, ugi

- mangda masupeksa ring Prajuru Desa, kalih ring panandingesoang-soang. Yan tan kalugra tan kapisukayang, pradenetaler kapurug, yogya sang mamurug katiwakan dandha gung artha manut pararem, tur ngamademang tatandurane;
- (7) Sangsapa sira ugi nakap tegal, nandur tatanduran tanem tuwuh sane ngawinang tanahe andog ring tegal sasakapan, ugi mangda makarya pasobhayaring sang maduetegalhinucap. Yan durung pinganan mapikolih tatanduran punika, sadurung mapikolih sasor ipun limang plabuh, sajaba sangkaning kahiwangan panakap raris kajabutin, yogya sang maduetegal nawur panjala sawit-sawit, gung artha manut pararem;
 - (8) Sang sapa sirauginakap tegal, tan kawasa ngarebah tatanduran tanem tuwuh, yan tan polih lugra saking sang madue tegal punika;
 - (9) Yan wenten wit-witan rebah antuk ka Panca bhaya tan dados kajarahin antuk sang sapa sira ugi, yan wenten mamurug keni pamidandha manut panglokika;
 - (10) Yan wenten wit-witan kateteb miwah karebah, raris niben wawangunan uthawi tatanduran anak sios, pradekatengahangka Desa wenang prajuru mamaosin tur niwakang pamutus manut pararem;
 - (11) Tan dados marereh-rerehan saluire ring Palemahan utawi sasakapan tan druwe, yan tan kapisukayang, yan wenten mamurug, wenten raris ngatengahang ka desa, keni pamidandha manut pararem.

Palet 3
Indik Wawangunan
Pawos40

- (1) Sang sapa sira ugikrama desa yan pacang ngawangun panyengker karang pomahan ring sawawengkon desa, patut masupeksa ring panandinge. Yan tan radin yogya nunas degdegan ring Prajuru Desa. Prajuru Desa degdeg saduhajeng ring sang mawicara;
- (2) Wawangunan ring Palemahan pecak tegal, Palemahan suwung,sane sampun masanggah pawon, Palemahan punika prasidha kabaos karang pomahan, dwaning sampun katiwakan pangupakaran karang, patut madue rurung betel ka margi agung, sukat dados pacang ngalintanggang papaga, dwaning tan kapatut ngalintanggang sawa ring tegal utawi bangket. Yan wenten mamurug, yogya Prajuru Desa niwakang tatepasan mangda sang mamurug mrayascita Palemahan hinucap;
- (3) Yan tan masanggah panguluning karang, kabaos akakubon. Tan yogya genah ngeraksa sawa. Yan wenten mamurug, yogya katiwakan pamidandha mangda mrayascita Palemahan punika;
- (4) Sapa sira ugi pacang ngawangun wawangunan genah ngalaksanaang upacara Agama luire : Pura, Masjid, Gereja, Wihara, miwah sane siosan, ugi mangda wenten lekita palugrahan Prajuru Desa, kalih lekita palugrahan Sang Amawarat. Yan wenten mamurug kadi kinucap ring ajeng, kabaos tan sidha karya, tan wenang anggen, tur wawangunan punika yogya wangdeang;

- (5) Wawangunan sajeroning karang pomahan, ugi nganutin Tri-mandhala : Utama mandhala, inggih punika sanggar panguluning karang; Madhya mandhala, inggih punika pagenahan mapumahan; nista mandhala, inggih punika ngaran lebuh;
- (6) Tan wenang ngungkulang capcapan wawangunan ka jeroning karang pomahan siosan tandruwe. Yan wenten mamurug, wenten ngatengahang ka desa, yogya Prajuru Desa degdeg, saha nipat gantungin. Yan jati lintang sajeroning selahe rahina saking puput babaose mangda sampun kapastika;
- (7) Tan wenang nganggen tembok umah wiadin tembok panyengkertan druwe. Wenang ya kasambatsara antuk sang madue. Yan akas tur mamurug sang kasambat sara, yogya katengahangka desa, tur kabaosan antuk Prajuru Desa tur niwakang pamutus manut pararem;
- (8) Sang sapa sira pacang mapawangun nepi ring margi ageng, nepi ring rurung desa, yogya mangda wentenlekita palugrahan saking Prajuru Desa, wiadinlekita palugrahan Sang Amawarat. Yan tan polih lekita palugrahan, ritatkala wawangunan punika katundungan tan polih prabheya katundungan;
- (9) Sang sapa sira ugi ngawengku karang pomahan, yogya hurati myara kahasriyan lebuh pakarangania, rurung pentasan pinih sor asukat karangnia ngalajur;
- (10) Sang sapa sira ugi ngawangun hotel miyah sapanunggilan ipun nampek genah suci ring wawidangan Desa, patut nganutin dresta saha ugi mangda wentenlekita pasobhaya kalih lekita palugrahan saking Prajuru Desakalih Sang Amawarat.

**Palet 4
Indik Wawalungan
Pawos41**

- (1) Sane kinucap wawalungan, sakancan buron suku patsanenadya kapyara,sakadi: bawi, banteng, kambing, kebo, misa, jaran, miyah sapanunggilan ipun; taler watek makampid sane nadya kapyara, sakadi: ayam, itik, hangsa, dolong, miyah sabacakan ipun;
- (2) Sang sapa sira ugikrama desa sane myara wawalungan suku pat, tan wenang ngalumbar, mangda tan ngarucakin, ngaletehin Palemahan tandruwe, miyah mamayen krama desa, jana pada. Yening mamayen keni pamidhanda manut pararem;
- (3) Sang sapa sira ugikrama desasane myara watek suku kalih, watek makampid, ytnain ugi mangda tan banget ngarucakin, ngaletehin, Palemahan pomahan,tatanduran druwen anak siosan;
- (4) Tan wenang ngangonang, negulang, hingon-hingonring Palemahan tan druwe, minakadi tan sasakapan druwe, yan tan kapisukayang antuk Sang madue.Sang madue palemahan, Prajuru Desa, PacalangDesa, Keliang-Keliang asing mamanggihin, wenang nyambatsara sang madue wawalungan ika. Yan akas sang kasambatsara, wawalungan punika wenang taban, Prajuru Desa yogya niwakang pamidandha manut lokika, gung artha manut pararem;
- (5) Yan itik, hangsa, dolong miyah sapanunggilan ipun, ngrucakin tatanduran, talerwenang

- taban. Indike naban mangda masaksi, saha kasupeksayang ka desa pramangkin, Prajuru Desa yogya mamaosin, niwakang pamidandha manut panglokika;
- (6) Yan wenten wawalungan ngeleb, mamegat ngranjingin Palemahan pura, kahyangan, setra, karang pomahan, miwah sane siosan lokikanen juga, yan tan nadya kalebang tan wenang taban, tur katengahang ka desa;
- (7) Sang sapa siraugi ngarerch ulam ring tukade, miwah sahungguaning hulam sajeroning Desa Adat Tangkup Anyar, tan wenang nganggen tuba miwah listri k saluir ipun. Yan wenten mamurug wenang katiwakan dandha gung artha manut pararem;
- (8) Sang sapasira ugi tan kalugra ngamademang uthawi morosin luire : manuk, paksi bojog, petu, luwak, kijang miwah sabacakan ipun, yan tan ngarucakin tatanduran, yan wenten mamurug wenang katengahang ka desa pramangkin, kabaosin antuk Prajuru Desa saha katiwakin dandha manut panglokika, kalih Pararem Desa;
- (9) Sang sapa sira ugikrama desa ngawangunang kandang wawalungan buatadol atuku, yan kandang ayam, itik, miwah sapanunggilan ipun, buat naluhang, miwahadol atuku, dagingan seket ukud. Yan kandang wawalungan suku pat, buat dagingan limang ukud, punika dados sajeroning karang pomahan. Yan lintangan ring punika daging kandange, tan dados wangunang jeroning karang pomahan, yogya kawangunang ring Palemahnasanemawaneng sasor ipun satus depa saking Palemahan karang pomahan, sekolah, kantor, pura kahyangan,minakadi genah sane kakeker wiyadin kapingitang antuk desa. Tur mangde madue lekita palugrahan saking Prajuru Desa lan Sang Amawarat.

**SAT SARGGAH
SUKERTA TATA PAWONGAN**

Palet 1

Indik Rangkat

Pawos42

- (1) Indik rangkat punika, manut Desakala patra, mwang sima dresta, sane kapatutang tur katinutin antuk krama desasoang-soang, tan singsal ring uger-uger panagara luire :
- ha. Papadikan;
- na. Ngarorod;
- ca. Ngunggahin;
- ra. Narimen utawi katrimenan.
- (2) Indik rangkat punika yan sampun mawidhi widhana pawihan, sanistania mabyakawon tur malukat, rangkat punika kasinanggah puput parikrama;
- (3) Yan wenten anak istri krama desa, karangkatang antuk sang sapa sira ugi, yan kantos arahina ring awengi saking dina matinggale saking jumlah ipun tan wenten pajati, yogya sang madue wirange nunas kanti ring Prajuru Desa mangda ngamargiang saserepan. Yan sampun sinah genahnia, ngararis ngamargiang padegdeg, saha nunas kanti ring Sang Amawarat;

- (4) Sang sapa sira ugikrama desa, yan karauhan tamiu praya masinutan malarapan antuk ngarorod, ugi mangda masadok mihuningang ring Prajuru Desa. Prajuru Desa yogya maritetes, yan sangkaning tan patut pamargin rangkatnia, Prajuru Desa nguduhang mangda katur ring Sang Amawarat. Yan wentenkrama desa mamurug, yogya sang mamurug keni pamidandha manut pararem, tur tamiu punika katundung saking desa;
- (5) Yan wenten krama desa, ngamet anak istri pinaka rabi tan manut sima dresta minakadi sastraagama, yogya katur ring Sang Amawarat mangda kabaosan saha polih pamutus;
- (6) Yan wenten saking liwaring desa pacang muput rangkat ka wawengkon Desa, sang madue wirang luh, yogya nunas pasaksi ring Prajuru Desa, sinalih tunggil mangda wenten ngarauhin, tur anake istri sane marangkat ngarorod patut ngaturang pangelingeling ka desa manut pararem;
- (7) Yan wenten krama desa ngarangkatang anak istri siwos ring magama Hindu, pawidhi widana pawiwhania patut kalaksanaang sasampun anak istri punika masudi wadhani.

Palet 2
Indik Palas Makurenan utawi Nyapiyan
Pawos43

- (1) Sane kabaos nyapiyan inggih punika, palas makurenan,sane sampun katiwakan pamutus antuk Sang Amawarat, minakadi sampun kakrabang ring sangkepan desa;
- (2) Yan wenten krama desa ngarangkatang sapiyan, sadurung tigang sasih utawi 105 dina, saking dina palase,yogya sang ngarangkatang sapiyan punika keni dan a pakerang manut pararem;
- (3) Krama desa sane nyapiyan, sasampun polih pamutus saking Sang Amawarat patut masadok mihuningang ring Prajuru Desa, sakasep ipun asasih saking palase;
- ✓ (4) Yan wenten anak istri wit saking wawengkon Desa Adat Tangkup Anyar, nyapiyan mawali ka desania, yogya sang madue wirange mrayascita marisudha anake luh punika saha kaupasaksi antuk Prajuru Desa.

Palet 3
Indik Balu
Pawos 44

- (1) Sane kabaos balu inggih punika anak istri utawi anak lanang sane katinggal seda antuk rabine, wiadin anak lanang katinggal nyapian, kawastanin balu;
- (2) Yan wenten anak istri balu kandugi marangkat yogya rangkat punika kapuputang antuk wirang lakine, lan kaupasaksi antuk Prajuru Desa, yan babalon punika kari pageh,
- (3) Mungguing wawanengan babalon luh, ring indik wawarisan, minakadi sane saos-siosan, nganutin uger-ugersane karajegang antuk Sang Amawarat.

Palet 4
Indik Sentana
Pawos 45

- (1) Sajeroning Desa, ngarajegang pidabdab sentana ka purusa sidikara tunggal, paperasan tunggal dadya;
- (2) Sang sapa sira ugi krama desa meras sentana, nuduk mantu, makedihang utawi nerahang raga, yogya sangkaning radin, tunggal sidikara, tunggal dadya maduluran upacara widhi widana manut sastra agama Hindu, kasaksinin antuk Prajuru Desa, saha polih lekita pamikukuh saking Sang Amawarat, kasiarang ring desa.

Palet 5
Indik Wawarisan
Pawos 46

- (1) Luire sane wenang kawarisin :
 - ha. Hamong-amongan ring Desa, ayah-ayahan sahurah-arih;
 - na. Hutang-pihutang sang kawarisin;
 - ca. Sarajadruwe, bhrana, tegal, carik, tatamyan, sakancan kasugihan.
- (2) Sane wenang ngawarisin :
 - ha. Manut lalintih paprenahan adoh tampek saking purusa tunggal sidikara, tunggal dadya;
 - na. Sangkaning polih pitemes saking sang kawarisin sang madue saluir sane dados kawarisang, saking palugrahan Sang Amawarat, pinih akeh apahtigayan saking padruweyannane maka piolih-oli pagunakayan;
 - ca. Putra paperasan.
- (3) Sang sapa sira ugikrama desa, yan tilar saking agama Hindu, tan yogya ngawaris sane kamulan patut warisin;
- (4) Ngedum wawarisan, kapatut pinih sor sasampun puput maabenang kalih ngalinggihang pitara sang ngawarisang brana kalih kasugihan punika. Sane dados dum, sajaba mangge padagingan pangaci-aci, minakadi saluiring sane mangge Piranti ngalaksanaang upacara agama, pustaka-pustaka sane kapingitang saluir ipun.

SAPTAMAS SARGGAH
WICARA LAN PAMIDANDHA
Palet 1
Indik Wicara
Pawos 47

- (1) Saluiring wicara indik adat ring wawidangan desa, wenang rinaosan antuk Prajuru Desa. Yan tan kasidhan puput, Prajuru Desa ngaturang ring Sang Amawarat;
- (2) Yan wentenwicara indik adat ring banjar, pamaksan, minakadi sekaa-sekaa siosan,

yogya kabaosan antuk prajurunia soang-soang, yan tan kasidhan puput, wenang katengahang ka desa, Prajuru Desa yogya mamaosin;

- (3) Yan pamutus wicara sane katiwakang antuk Prajuru Desa tan katinutin utawi tan kahiring antuk sang mawicara, wenang sang mawicara nunasang pangraos ring sang patut mamaosin;
- (4) Yan sang mawicara tan tinut ring pamutus wicara sane katiwakang hinucap ring ajeng, prasidha sang mawicara tan kalugra polih patulung saking desa.

Palet 2
Indik Pamidandha
Pawos 48

- (1) Luir pamidandha sane wenang katiwakang antuk Prajuru Desa, banjar adat, pamaksan, sekaa-sekaa siosan, sawawengkon Desa, sakadi ring sor puniki :
 - ha. Dandha artha;
 - na. Upasaksi, dewa saksi, pangratarata, sumpah;
 - ca. Dandha panyangaskara, luire; mrayascita, marisudha, miwah saluir ipun,
 - ra. Pamidandha siosan manut palugrahan Sang Amawarat.
- (2) Patiwak pamidandha, manut ungguan wicarane soang-soang, minakadi werat ringan wicarah inucap, luire :
 - ha. Yan wicara ring desa, yogya kapidandha antuk desa. Mungguing dadandhan mantuk ka desa;
 - na. Yan wicara ring banjar, yogya kapidandha ring banjar ika, dadandhan mantuk ka Banjar;
 - ca. Yan ring pamaksan, minakadi ring sekaa-sekaa siosan, katiwakang pamidandha ring kuwu tempekania soang-soang, mungguing dadandhan mantuk ka kuwu tempekannia soang-soang.
- (3) Agung alit dadandhan, manut panglokikan agung alit werat ringan kasisipane sane munggah ring Awig-Awig gagaduhan soang-soang, minakadi pararem pinaka pamutus paruman.

ASTAMAS SARGGAH
NGUWAH-NGUWUHIN AWIG-AWIG
Pawos 49

- (1) Sane wenang nguwah-nguwuhin inggih punika, pasukertan, pararem, pamutus pararem, wiadin pamutus paruman miwah sane siosan sapanunggilan ipun;
- (2) Sane wenang nguwah-nguwuhin inggih punika, pasukertan, pararem, wiadin pamutus paruman miwah sanesiosan, manut tata kramaning paruman;
- (3) Indik nguwah-nguwuhin Awig-Awig, manut tata kramaning paruman sasampun nunas tatimbang ring Sang Amawarat.

NAWAMAS SARGAH
PAMUPUT
Pawos50

- (1) Awig-Awig puniki mawasta "Awig-Awig Desa Adat Tangkup Anyar";
- (2) Awig-Awig puniki pinaka bantang sahananing Awig-Awig, pararem, pasukertan, miwah saluir ipun, sane mangge ring banjar adat, Pamaksan, sekaa-secaa sane wenten sajeroning Desa;
- (3) Banjar, Kahyangan, Pamaksan, sekaa-secaa sane wenten sajeroning Desa, wenang ngawangunang Awig-Awig, pasukerta, pararem, gagadhuhan soang-soang, nanging daging ipun tan yogya singsal ring Awig-AwigDesa;
- (4) Saluiring sane durung munggah ring Awig-Awig puniki, kaunggahang sajeroning pararem saking pamutus paruman desa;
- (5) Dresta sane kantun dados angge, yan tan tungkas ring daging Awig-Awig Desa, manut ring uger-uger nagara, saha kaputusang sajeroning paruman desa;
- (6) Awig-Awig Desa, kawangun antuk krama Desa Adat Tangkup Anyar, kapastika manut Upacara agama Hindu, kala dina; Buda Wage, Wara Kulawu, sasih...., tanggal ping .., rah, ..., tenggek, ..., Isaka, 19..., magenah ring Pura Puseh Desa Adat....., kapuput
- (7) Awig-Awig puniki kalinggatanganin antuk Prajuru Desa, luwire : Bandesa, Panyarikan, Juru Raksa, kasaksinin antuk Kelihang Banjar Adat , Kelihang Banjar Dinas Tangkup Anyar, Perbekel Tangkup, Camat Sidemen, kakukuhang antuk Bupati Karangasem;
- (8) Awig-Awig puniki kalaksanaang ngawit dina pamastika punika kantos salantur ipun;
- (9) Luwir sang ngalinggatanganin :
ha. Prajuru Desa:

Bandesa,

I Nengah Suwita

Panyarikan,

I Nyoman Sadia

Juru Raksa,

I Nyoman Sutama

na. Maka saksi :

Keliang Banjar Adat Bunder Kelod:

I Nyoman Konten

Keliang Banjar Adat Bunder Tengah:

I Ketut Subawa Arianta

Keliang Banjar Adat Juuk Limo:

I Nyoman Sara

Keliang Banjar Dinas Tangkup Anyar:

I Nyoman Karnata

Perbekel Tangkup:

I Gede Sukarnadita

Camat Sidemen

(.....)

NIP:

ca. Bupati Karangasem pinaka murdha pamikukuh
Kalekitaang ring Kantor Bupati Karangasem,
duk rahina,
tanggal Masehi,
Reg. Nomor :

BUPATI KARANGASEM,

I GUSTI AYU MAS SUMATRI, S.Sos. MAP